

介亭文集

介亭文集卷之五

皖江江濬源岷雨著

諭八屬慎選館師札

滇在前代荒服之外

國家誕敷文教遐遠不遺歷任是邦之賢哲類能仰承德意宏育人才攷之彙記所載通省州縣義學計六百五十有餘所而臨安一郡設至五十有九所之多其勤勤於邊土之民而爲之立學者視中土有加詳惓惓於在鄉之士而使之親師者與在城無以異蓋一時

興造之盛可謂盡心者矣惟是地界邊隅人分夷漢  
生徒分布雜而不齊各館之師自不能不因便宜  
以附近之舉貢生儒充其選所慮因循常例視延請  
爲具文不幸師非其人學就荒而成材者寡則咎誰  
追也蓋嘗論之所貴乎師之無慚厥任者其要有三  
觀摩視其品講習視其學誘進視其功三者備而後  
師道歸焉苟爲不然以多士楷模之地任行止乖戾  
之人廁其際其身範旣絕無可稱而孝弟忠信之大  
端禮義廉耻之大節亦且終朝聚處嚙口卷舌而不

言向化之民無由興行夷弗變爲夏漢且等於夷防  
檢蕩然其害不爲細又或傳習素無根柢本末歷乎  
向學之等焉能明於授學之方雖有聰穎秀良傑出  
於邨野樵魯中者不鹵莽以敗其才卽委隨以頽其  
志不殖而落無怪其然矣嗚呼士習端則民風厚師  
道立則善人多諸君子尙亦慎擇於此哉擇之如何  
曰求其品之足以爲範則咨訪於士論之公者不可  
以不豫也求其學之足以爲程則遴選於送館之始  
者不可以不嚴也求其功之日進而不已則稽訓課

於時月之間者不可以不核也誠使行此三者而持之以可久無循名而失實無有初而鮮終將見羣萃肄習之徒朝夕親炙於言動有常潔修自好之賢師皆得閑其邪僻放肆之心以進而敦勉乎立身行己之大較而且時承啓迪學有本原詩書絃誦之聲颯颯乎相與爲競秀民能爲良士夷俗亦被華風其有造於斯人者豈淺哉水之漑也不見日益澤有時而滋材之培也不見日蕃實有時而遂教之行也不見日疾功有時而成習尚之所以醞人心之所以厚英

杰之所以奮起而登庸其亦不待他求而可以旋至  
而亦有效者矣諸君子有不迂吾言者乎其力行之  
毋忽

諭八屬清查學田札

滇南義學之設視中土爲多而臨安風氣早開設學至五十有九所自乾隆初年經前大憲倡率籌畫分置租田俾修脯膏膳之資歲有常給已縷載案冊昭示來茲顧惟良法之留遺歷年滋多流弊滋起非後人不能爲繼亦因循積漸有由然也攷之彙記義學之穀石有以儒學餘租及官庄公租裒而給之者是則計租不復計田按數分撥官自爲政者也養育人才漸摩風俗凡在官者與有職任方期共與倡先紳

士勸諭捐輸庶幾優遊肄業之徒藉之日新而月盛  
若官司以久經派撥具有成數之公租猶復取便已  
私小有靳惜固極知厚自顧藉者必且相戒而不爲  
獨慮有按田定租如移撥舊存公產暨畫歸新查隱  
墾并該地方官同各士民捐資備置者其田皆由民  
佃其租各聽民輸田有未清卽租將無着則及今欲  
爲清租之策最要莫先於清田論田之散隸四鄉多  
者分一處以備數館之需少者合數處以資一館之  
用其撥給亦極參差而不齊然等則有常科坐落有



常所坵塍有常數界址有常形無難按冊而稽卽易  
履畝而勘是在良有司黽勉力行求覈其實而已爲  
此札該州縣知悉札到尙卽悉心經理設法清查務  
使各館恒產之存瞭然畢具刁佃之隱佔窮於無所  
施奸民之旁侵戢而不能肆其有私典私塾朝甲暮  
乙以及牽混抗欠勾結阻撓之陋習亦皆嚴行杜絕  
無或其徂以爲常則田各有歸租非無出自此廩餼  
饒裕敦請賢師向學之徒咸被其澤成材之士相望  
於時豈惟懿懃貽自前賢者無重廢弛不張之咎雖

諸君子勤思長育異時薦登上考不愧其名斯亦一端之較著者已再各義學尙有續置之租田及現今事理與彙記不符者已另札行查亦卽開具細冊報案毋遲爲要

再諭八屬清查學田札

前札該州縣以各館穀石由儒學餘租官庄公租分撥之數向有定額循以爲常館不歲增官不歲減凡屬職司敬養者自無俟丁寧關說始免靳惜之虞獨計籌置入館之田由佃輪租歷年久矣使田有未清卽租將無着此清租務先清田之議所爲不憚辭煩也茲竊惟清田之要貴乎核其實而持其平以求斷截衆流而爲久遠可行之策則按冊而稽之足據自不如履畝而勘之可憑而履勘之情形不齊坵塍旣

有奇零界至亦多叅互屆今欲杜刁佃之隱佔奸民之旁侵則惟有於親詣確勘之時各處各繪一圖詳細貼說計畝若干計租若干現係何人佃納四方有界四隅有界現與何姓毗連均縷晰條分彙爲冊而立之案如是則二者之患從此剔除租田班班其有數至於承種之戶無論漢夷人等務由官爲給照逐一載入田之坐落及所領認之租畝使各執據輪納歲以爲常其或彼此情愿替耕必令上交下接之人公同攜照赴官繳舊給新以專其責查有擅相授受

者概以盜賣公田之罪罪之如是則私典私塾之陋  
習藉以禁止其端而盤踞抗玩之徒無從餘混卽另  
招妥戶其勢亦甚便而易行諸君子未爲不達時務  
者也請試核之斯非事之允協而無慮窒礙者歟再  
滇南田土大率以科則計之多有寬餘雖此次清查  
不能不藉資丈量然後廣輪獲歸於確實亦祇宜仍  
照原定租額不議加增則固格外軫恤佃民之一節  
也而其間又或值旱潦不時租難如數則又須據情  
勘估酌令減輸另籌館租之所出爲要是亦存乎仁

心爲質者處置得宜無任胥役藉端紛擾而已總之  
繪圖給照惟期釐現今之弊立善後之方各州縣不  
過費旬日之勞可以遍周而立辦自是踵而行之或  
以三年或以五年繼事者亦必有志焉諸君子尙其  
實心清理卽將查辦緣由備具圖說報案不勝翹望  
之至

諭勸我在城紳士捐輸登雲書院修膳札

稽我城鄉向置義館者七縣前之館近城漢人子弟  
肄業其間甚便也若如甸頭甸中甸尾興衣化念俄  
說之六鄉地僻而多夷其貧儉之家力既艱於延師  
亦鮮能裹糧而就外傳長民者思有以變夷俗而進  
華風六館之設所由來矣已而慈惠之有司不多觀  
未能深維前賢所以愛養夷人誘之使學之至意因  
循歲月振飭無方塾師不慎選其人館穀不釐清其  
弊浸以歲有常額之修脯致爲一二醜面素餐不自

顧惜者假託竊據肥潤其身家訓課之益罔聞虛糜之尤相效甚且公無忌憚立券分收師道之敝也極矣該紳士有憤於鄉校之建名存實亡議以各館原租概裁而歸之登雲書院亦事勢之流激使然宜無足怪然而敗壞已甚咎有攸歸六鄉之民無過也與墜舉廢存乎其人前賢盛事之留遺亦非旣頽而不可復振也嘗試準情理之平絜之以篤近舉遠一視同仁之大義則書院之建置信善而鄉館亦未可盡裁縣前之義學可與書院合併而爲公而其在甸頭



六鄉者究宜並存而不廢邇據該鄉民人李宗尹李  
思道等籲請恢復舊館給還額租等情到府業已允  
其所請並給示勒石俾得永遠遵行茲竊有專爲在  
城紳士剴切勸勉者查登雲書院經前府張公肇建  
方新其惓惓乎崇興文教養育人材屬望在城之紳  
士者甚厚諸紳士環城而居服習詩書之人衆名流  
英俊時時振發於其間視六鄉之民僻陋在夷者未  
可等類而同語則書院經費無俟借資六鄉而後濟  
亦夫人而知之也自後六鄉館租已還其舊諸紳士

其尙勤思培植勉力勸倡率同人捐輸經理務期  
在城書院束修膏火充然其有餘禮延賢師朝夕訓  
誨使凡聰明秀良之子弟皆得聯翩蔚起成就其閥  
遠樸茂之材進爲

朝廷用守土者蓋亦與有榮施焉勗哉無怠

諭臨安紳士修志札

照得臨安縣志之傳於今者自山左楊庵張公无咎  
來守茲土念前明麗人楊公俱暨

國朝前守程公應龍各舊志皆已殘缺不全因於雍正  
己酉倡始纂輯繼以祝君宏夏君治源續承盛美歲  
事於辛亥之秋攷其條分二十四類卷亦如之事詳  
以核辭簡以該畇町偉觀斐然流被矣然邇是書旣  
成之後逮今六十有五年月異歲移萬有增益諸如  
建置沿革制度變更以及傑士豪人忠孝貞烈踵興

振發於其間罔不繫文獻之傳關風化之本如前賢而可作必復有感於斯也而余方繼守是邦思有以助流政教顧猥安固陋坐令數十載以來纂述之文缺微而不備墜嗣音於既往留遺議於方來吏職之不揚滋有赧焉今擬從事續修補綴前志所未載諸紳士得無意乎蓋是舉也諏羣言而存國故篤世教以厚人心守土者不敢以不敏謝至於延訪之周見聞之核採之有不誣之實傳之爲行遠之言則竊於諸紳士有厚望焉且維桑與梓必恭敬止諸紳士繹

思雅歌之日久誼亦未可以苟止情亦未可以苟安  
也爲此札知各州縣紳士札到務卽約結朋好於春  
二月之十有五日會齊詣郡詳議規條有道德能文  
章者其敦請之輕貲財贊懿嫩者其協籌之惟蘄詢  
謀僉同定期開局俾一時盛事庸底於有成則庶幾  
此邦之典型重光籍乘前哲之音響賡續來茲雖以  
余承乏於斯學問行能自分未足以爲楷亦私幸偕  
諸紳士廣樹風聲無貽隕越卽異日從容別袂當不  
至羣起而訶也此札

介亭文集卷之六

皖江江濬源岷雨著

陳臨安招募鄉勇狀

竊照臨安爲南隅重郡邇因貴州南籠苗匪跳梁逼  
近滇境叠奉檄調兵練前赴平彝羅平廣西等處協  
同堵防現在存城之兵爲數無幾業將營伍單寡情  
形瀝陳在案郡屬士民頃又聞苗匪結連五槽沙人  
蔓及師宗邱北兼有遊閒好事之徒張大恐喝幾至  
市廛鄉寨驚怖不寧某曉諭安撫至再至三而人心

尙自惴惴雖倡言煽惑者不過三五莠民萬不敢嘯聚生端別懷希覬而有備無患之策要必妥速商籌茲據邳城紳士富民謝奉璋曾岷傅爲誅張沛張含英等聯名呈稱奉璋等其沐

國恩世居樂土情願量力捐貲懇請招募鄉勇六百名隨營操演保護地方酌議每鄉勇一名月給食費銀一兩四錢每五十名設隊長一名每名月給食費銀一兩七錢以示獎勸惟需費在卽一時難於措備乞詳明酌借庫項先爲墊給容俟陸續呈繳歸欸不敢

宕延等情前來伏思前請酌調土練協守郡城乃係  
一時權宜之計究之邊夷野性異於腹地民人祇可  
使之張我聲援未可倚以固吾疆圉五嶠沙人卽其  
明鑒且現在各土司又紛紛籲請免調以重邊防其  
勢亦難再派今該紳士富民等稟請招集鄉勇殷戶  
出資貧民出力以壯衆勢以安人心實屬念切維桑  
咸知大義當經准其所請會督各該管鄉約募選得  
健壯鄉勇六百名釐定規條輪流演習碁布郡城關  
廂內外晝夜巡防至於該紳士等愿捐鄉勇食費適



當急需辦理之時不得不於庫項中先爲通融籌墊  
日後歸款諒無他虞但此等食費旣係出自公捐卽  
未便官吏經手頃亦選派誠實妥幹紳士傳爲詵張  
沛曾岷劉暉吉等四人專司出納某仍會同營員酌  
定日期按名給領勿致侵扣混冒別滋弊端指日軍  
務告竣前項鄉勇卽概行裁撤令其歸農是否如斯  
理合陳請衡鑒

陳威遠兵練不敷堵防狀

照得威遠後路先後集兵一千九百名由普洱書鎮  
分置沿江各要隘同原留續募土練嚴密堵禦籌慮  
本屬周詳嗣於本年正月內經書鎮抽兵五百九十  
五名自猛撒過江於圈嘴蠻怕蠻達平蠻等處劄營  
進剿茲又准書鎮移開遵奉憲札挑撥翁烘湯家邨  
鍋底塘柳安舊營盤邦洒蠻万邦冒蠻遠等隘口官  
兵八百名委守備徐達管領馳赴大營聽遣是前在  
大箏打環雙江蠻鉄蠻疊蠻白沿江一帶分布防堵

者今已盡撤空虛其有散駐茂菽蠻別及猛戛猛班  
猛住猛撒各處之兵五百零五名雖復洒派分防大  
懼綿亘三百八十餘里之長江浮寄孤懸彼此無從  
呼應尙望其內堅心志梭巡不致踈虞外壯聲援匪  
衆不生窺伺揆諸情事殆其難之且緬寧重兵已將  
黃草壩蠻糯各賊巢剿洗淨盡進攻猛白大箐則威  
遠各隘口如打環雙江等處正值嚴防窮竄之時而  
書鎮帶兵五百九十五名駐劄猛撒江外又僅屬猛  
連邊界賀札邦合之後路與猛猛尙未克復各賊巢

相距遠甚進旣不可退亦不能至威遠雖屢覓士練  
尙多均係按照門戶抽派平日旣不諳軍行紀律其  
所執器械亦不過鏢弩等物未能遠攻兼之恇怯性  
成難期如官兵之得力現在沿江數百里所恃以防  
剿賊匪者單弱之全形畢著民夷驚恐勢所必然某  
素不知兵亦何敢妄叅末議惟是奉委督辦糧餉事  
宜時慚未能報稱如管蠡之窺測匿不以聞萬一少  
有他虞咎何能追因不揣冒昧據實稟請憲鑒仰祈  
迅賜籌度俾有遵循實爲公便

請調納樓土練赴威遠協防議

照得威遠爲猛夷境後路沿江各隘口在在均與毗連某於本年二月十四日業將兵練單弱不敷堵賊情形馳稟憲鑒在案竊惟逆匪巢穴近日大營已調集重兵圍攻兜剿是威遠沿江一帶正值嚴防窮竄十分吃緊之時非再請增派兵練堅衆志以備賊誑殊無善全良策所有各鎮營司以抽調之官兵某未能悉其端委惟查臨安所屬有納樓土司地方民戶尙稱殷阜土官普澤平日亦頗踴躍急公向有額

設土練六百餘名皆分給練田以資養廉平時則大  
農旣暇操演克勤有事則奉調卽行險危不避謂其  
技能材勇較勝九龍江之強勁所不敢知至以視威  
遠之募民充數有練之名無練之實要遠過之其練  
旣尙屬可用邇又值納樓邊界牧寧而威遠江隘方  
急需防堵難緩須臾如徵調使來不過飭令派及種  
有練田之家不致苛擾卹戶且祇須於起程及到防  
之日照例支放鹽糧其行裝坐餉等銀均可毋庸給  
予若將來從公得力量賞其勞則惟出自憲恩該土

官亦必別無希覬某爲籌辦防江起見倘大營成功  
在邇是舉卽可不行萬一後路尙應酌調堵禦期保  
無虞可否卽飭納樓土官普澤選派土練五百名前  
來威遠協防之處理合稟祈鈞鑒迅賜批示遵行實  
爲公便

查勘抱母恩耕鹽井工程課款議

照得威遠軍務業已告竣護道遵卽馳抵抱母勘得該處東西夾峙兩山河道發源甚遠自嘉慶元年六月內河水陡發沙急石隨鹽井竈房俱被冲刷經威遠同知劉大鼎於是年九月內到任詳准動項修理計井五區頭井係在河中微偏西岸其臺座斲石壘成外高內深須梯登下二三四井悉處河東逼連衙署鹽倉民居錯互井眼寬廣四面皆方尾井下傍河右形小而圓涵供汲煎不過數戶茲合五井觀之地



盤之大小各殊工費之繁寡不一要其砌列臺基安  
排對吉護以礮礮環以橋墩均屬完固整齊足以備  
隄防而經久遠蓋亦鑒於前茲開設之始臺薄岸低  
河水突衝驟難捍禦故也旋詣鎮沅恩耕勘得該處  
南北皆山多係懸崖峭壁中有溪河一道登高而望  
邨戶宛在河中較之抱母地形逼窄彌甚計井有七  
大井尾井在河正中劉家井孫家井中井在河右岸  
上井自來井俱在高阜方其與抱母同時被水井竈  
房屋柴薪鍋具一概壅淤茲逐井履視井集詢各該

竈戶除尾井淪沒已久不能尋獲涵源無可修復外  
其大井劉家井經前署州福桑阿請項興修現尙完  
好上井孫家井及自來井均未冲壞亦可毋庸置議  
獨中井形模雖尙如舊而各戶汲煎者俱稱被水之  
時亂石橫衝擊破海底淡水浸入難於煎熬籲請官  
爲拆修以甦窮戶護道頃已飭行署鎮沅州事江州  
縣知縣李浩估計辦理至該處礮岸一以護井竈一  
以衛民居興廢之間所關非細自應及時修築輩保  
無虞惟是相其地勢諮及土人原舊河身南北兩岸

相距止二丈有餘及大水漲發以來漩寬幾於五倍  
河流外溢歷有數年岸卽是山山卽是岸最要惟期  
井臺堅固足捍奔湍至舊時近水民房久經蕩析被  
災民戶各已別謀止居其有宅於河濱者亦皆自行  
甃石培高以防淹漫雖工程興作勿憚煩勞第據現  
在情形度之事屬可已無庸徒糜經費爲也再現定  
章程抱母每年額煎鹽一百七十六萬零七百九十  
六觔恩耕每年額煎鹽八十一萬八千一百觔除抱  
母各井已經修復滴水頗旺年可煎鹽如額無庸議

外查恩耕舊額應煎鹽八十七萬二千五百二十觔  
配發元江他卽行銷其課款銀兩卽由該州廳解繳  
鹽庫自元年各竈被水以後停止未煎未配繼於二  
年四月內署州廣照報明開煎每月約出鹽一萬四  
五千至二萬一二千觔不等二年十月內署州劉大  
鼎到任招添竈戶每月約出鹽二萬八千至三萬  
餘觔不等至署州福桑阿於三年十二月內報修大  
井及劉家井二區每月計出鹽五萬觔亦仍未能趕  
符舊額今現章年應煎鹽八十一萬八千一百觔雖

較之舊額有減無增第尾井既成廢井其餘自大井  
劉家井而外各竈戶均紛紛稟稱節年涵汁變淡遠  
不及未有水患以前勢難趨煎符額護道細加體察  
委屬寔情因查寧洱地方有新開石膏箐子井產鹽  
豐旺可否將恩耕井煎不足額鹽飭令寧洱新井  
代煎免致課歛墮誤之處請祈憲裁示遵緣奉飭委  
理合將履勘抱恩兩處已未修理工程及鹽難足額  
情由詳請憲臺俯賜查核施行

條陳稽查所屬夷地事宜議

某皖江凡材知識淺陋驟膺繁劇諸多未諳自初夏履任以來舉凡察吏安民撫馭邊夷各款要日惴惴講求咨議唯恐勉副職守之未能竊查臨安爲滇南要薨幅幘遼闊逼與交趾南掌爲鄰所轄十土司十五掌寨計其文報程期遠距薨城動需五六日及旬餘而後至其與外隅毗連之地瘴氛淫毒夷種叢多而三猛尤爲極邊隘渡汎塘最關緊要雖一切防禦事宜具遵舊章辦理邇皆畏威懷德寧謐無虞惟是

諸夷好貪小利不善謀生歷年內地民人貿易往來  
紛如梭織而楚粵蜀黔各省攜眷世居其地租墾營  
生者亦幾十之三四每有狡詐剽悍之徒始或認種  
田畝並借販賣茶布針線爲端希覬盤踞繼則夷情  
既熟輒敢多方煽誘恣其把持甚至窩引匪人肆竊  
攘奪構衅釀案羣累無辜而若輩仍得隱匿姓名置  
身事外鬼蜮伎倆固結不搖此等漢奸實爲夷方之  
蠹某諮訪既確亟當設法清其源本嚴行查辦綏靖  
邊夷又如土司掌寨世襲其職巡防控馭責有專成

務在遵守夷規嚴肅外防廓清內境庶使邨落各安  
生業藉以保其土地傳及子孫茲不揣冒昧謹就管  
窺所及謬擬數條具呈另摺是否可採伏祈衡奪飭  
遵再事關查禁夷地新定章程倘蒙允准施行若僅  
由某奉批示禁恐習玩已久遽難必其遵從仍懇徑  
頒禁令通飭曉諭俾各民夷咸知令在必行益加感  
悚不敢玩違實爲公便某謹議如左

一臨安土司掌寨地方凡內地民人挈家久處租  
種爲生者宜設立甲總嚴行稽查也查此等民



人落業夷寨畜妻生子丁口漸繁遽欲逐戶押  
遷勢既不行情亦未順然若輩連邨聚族性匪  
馴良其計謀較勝於夷愚其徒衆每聯爲漢黨  
視放債盤剝占奪財產之事藐若故常或復誘  
使作奸犯科供其巧攫而外來面生可疑及爲  
匪滋事之人浸尋混跡其中憑恃鄉井之親獲  
資棲託逗遛勾結牽制平民至受累難堪卽不  
幸往往有事應請仿照編排保甲之例凡屬內  
地攜眷安家在夷已久之戶責成各土司掌寨

每邨寨市店挨戶清查十家設一甲頭十甲頭  
設一客總概以夷人之樸直曉事者爲之着落  
編次各戶姓名籍貫給與門牌註明年齒男丁  
女口若干係於何年月日搬住該處現在作何  
生理逐戶開造成冊不得遺漏名口由該管土  
司掌寨呈報府縣存檔倘有盤剝誘唆不法等  
事許甲頭同附近環居人等舉報客總確查屬  
實卽轉報土司掌寨解府縣究治并將家口  
遞籍不許仍留在彼爲累夷民其面生可疑之

人嚴查驅逐毋得姑容至如有肆竊滋擾各弊  
立即報明土司掌寨並將窩留之戶拏送究辦  
若邨鄰互相容隱即干連坐甲頭客總狗縱一  
併治罪

一內地民人本不得擅入夷境凡往來營貿并仍  
前攜眷覓住以及遊棍潛入生端者宜設立隘  
卡嚴行盤詰也查臨安土司掌寨內隸版圖歷  
有年所客商絡繹習以爲常原難杜其謀生之  
路而近日攜帶家口之輩次第繁多夷寨地方

漸已艱窘加以漢奸投入朋比戕虐轉成反客  
爲主之形鳩居鵠巢牢不可破聞之焦爛救火  
不如曲突徙薪言治於已事難爲功防於未事  
易爲力也竊照各土司掌寨均有扼要隘口向  
因內民赴彼貿易每多挈族而行日久相沿疎  
於盤詰遂致遊蕩匪棍混入爲非應請頒示責  
成各土司掌寨於管轄扼要諸隘口各另派妥  
實目練五名官給循環印簿二本常川在口稽  
查凡入夷營貿諸人悉令報明籍貫姓名同行

幾人販何貨物計若干馱擔往何處販賣於某  
月日經過某關隘出入一體分晰登填不得稍  
有遺漏按月將印簿送府查核循去環來接續  
無間遇有攜帶家口入夷覓往之人概行禁止  
至於形踪詭譎隻身無業或三五成羣藏帶器  
械並藉稱係本管府縣差役營汛兵丁查無印  
票執照以及各處遊牌不由所過州縣掛號者  
卽均屬多事遊棍務須加意究詰拏解嚴懲均  
不得任其混入夷地其實係貿販人等驗明放

行毋得任意留難仍飭令土司掌寨着落分管  
邨寨目練伙頭時刻巡查視其貿易貨物多寡  
限以時日催令出境不許久棲如有未經登簿  
匪徒潛入滋事別經拏獲究出是何處疎虞卽  
分別枷責若各汛卡隘口有能盤獲匪徒送官  
者無論弁兵土目均酌量獎賞以示鼓勵

二 夷衆與內地民人聯結婚姻宜令分別嚴禁杜  
絕盤踞也查客民經商投向夷地挈家而往者  
漸次已繁更有本屬單子之身挾貲潛入初惟

倚漢奸在彼代爲營謀已而愚夷墮其術中取  
便一時至與聯爲婚姻妻以子女因而憑藉夷  
婦往來邨寨行放錢債滾剝多方是若輩始則  
以漢民倚勢漢奸張其聲援之助繼且以夷婦  
交通夷衆逞其刻削之私攘取財貨由於此準  
折土田由於此鳩聚滋多鴟張滋甚日復一日  
查禁彌難某前條所陳雖於入夷貿易人等請  
飭限之時日催令出境不許久棲正恐夷民無  
知誤爲若輩籠絡轉得藉有新立家室礙於驅

自完竊惟杜絕訟累雖內地亦例嚴主唆使其行之夷方更爲法所難宥應請嚴飭土司掌寨於夷民訴訟戶婚田土務須細心分割將情虛理曲者窮詰其主意係何人所出詞狀係何人所爲在不通文理之愚夷本不難於跟究一經據實供吐果係出自漢奸凡在土司地方者輕則隨案懲責立即驅除重則解交有司究治其主唆之罪其在各掌寨地方者拏送該管州縣分別遞籍嚴辦務令有犯必懲概不得任其飾



詞狡卸姑予從寬庶或杜訟端而安夷衆

一土司掌寨字識委任經管夷務宜令慎選其人並立法考察也查夷人不識漢字一切交查事件文稟不得不聽其招募內地民人充當字識現在各處字識循分守法克盡其職者曾無幾人多有罔知顧忌之流營幹土館號爲主文一經遂其夤緣竟爾恣意把持舞文滋弊竊檢查舊卷每見土司掌寨控爭襲替及苛刻夷民各案無非該字識於中煽惑播誘致釀衅端甚至

土司掌寨甘爲所愚蕩產傾家襲職難守而若輩陰助其惡明搜其財爲害夷方所關匪細應請嚴飭土司掌寨務須選募誠實曉事之人承充字識將姓名籍貫開報府縣立案如查有玩法弄弊之處卽按例從嚴究辦庶或清夷署而肅吏規

諭臨安居民投充鄉勇文

照得貴州南籠苗民不法擾及雲南平彝羅平師宗  
邊界業經大憲督調兵練分路捕拏近日間有窮潰  
匪徒遁入邱北一帶查該處距臨安甚遠自可無蔓  
延滋擾之虞無如各色民人因莠言傳播竟至自相  
驚恐不遑寧居頃據在城紳士及殷富人等呈請招  
集鄉勇六百名訓練巡防以資保障並公議捐資按  
每鄉勇一名月給食費銀一兩四錢其有拔爲鄉勇  
首者於一兩四錢之外再加銀三錢分酬勞苦等情

前來本府思設防事宜不厭廣備業已允其所請詳報舉行惟念爾等應募而來者俱係食力貧民須知殷富之家既捐給爾等口食爾等卽當奮勇出力協同守防况爾等亦各有室家藉資保護衛人卽以自衛事屬兩全尤宜踴躍應招毋容觀望除飭建水縣傳諭鄉保迅速選報外合亟出示曉諭爲此仰郡屬人等知悉凡爾等強壯之民情愿充當鄉勇者立即赴該管鄉保處報名造冊投府驗充其月需銀兩俱由本府當堂按名發給該鄉勇等惟當認真効力習

藝嚴防不得以老弱疲癯混冒充數如鄉保有從中刁難需索等弊查出定卽從重究治不貸切切特示

諭阿迷居民協防苗匪文

照得貴州南籠犵苗擾及滇南邊界現在大兵雲集  
於毗連黔省之平彝羅平師宗地方會同堵剿邇雖  
間有潰散匪徒竄入邱北亦已分派兵練前往搜擒  
臨安居民宜無庸過自恒懼要之慮患必先設備衆  
心可以成城查阿迷東南逼近邱北此時籌調防禦  
尙未集齊爾等州民卽當糾約寨衆於各要隘處所  
實力分堵截其狂奔所有分堵規條務須公同酌議  
令財裕丁單之戶資給貧乏有勇力者日需俾得專

意任勞無憂內顧而貧乏有勇力者同心協禦亦藉以安居故土不致有流離轉徙之虞所謂務一而兩得也酌議既定應卽倣照團練遺法每十名派一甲頭每百名派一甲總每一甲總備置銅鑼革鼓各一面督率能幹約保伙頭人等不動聲色帶領巡防所在紀律分明聲勢聯絡一有賊眾蔓入卽鳴鑼擊鼓爲號彼念切應前躡後追則匪徒自無地容身焉能滋擾本府呼此民依爲此剴切曉示仰州屬城鄉村寨漢夷民人知悉爾等各當迅速遵照示內章程先

事嚴防以爲不虞之備倘示後或有遊閒無業者從  
中肇衅生事搖惑人心許該鄉保民人立即扭稟地  
方官重法究處稟之毋違特示



諭曲江居民協防苗匪文

照得雲南大兵頃已齊集邊界兜拏貴州叛苗因間  
有被勦計窮之徒竄擾師宗一帶是以調派臨安兵  
練前往協擒現復傳有潰敗匪徒混雜難民之內沿  
途掠食侵至邱北亦經分撥兵練堵截驅除蠢爾遊  
魂自必易於掃蕩至臨安去邱北甚遠所屬居民本  
不應妄生驚恐願不虞有備事之善經也昨據郡城  
紳士富戶公議捐資廣招鄉勇隨同兵練操演嚴防  
附郭人心俱已鎮定惟念遠鄉屯寨如曲江六營煙

戶稠雜無知民衆未必不因傳聞之誤致涉張皇本  
府再四籌計爾等欲慮患未然惟當照郡城現辦事  
宜糾約鄉鄰悉心酌議凡家業殷實者協同捐出銀  
糧安集貧乏強勇之人給予日食使之什伍類聚連  
絡守防如此則富民爲貧民出資貧民爲富民出力  
彼此共居鄉里共保室家先時旣壯聲援有事必無  
騷動爾等皆係安分良民父子祖孫世享

昇平之福不見兵革者已百有五十餘年何筭不及此  
乃因邨市三五莠民倡言搖惑無事構爲有事一人

傳至十人輒爾奔走蒼黃曾不反顧是誠愚而無用  
轉受人愚也合亟諄切曉諭爲此示仰郡屬曲江漢  
夷居民人等知悉爾等各宜猛省糾約鄉鄰共籌萬  
全之策同心防護期保無虞慎勿率信浮言自取其  
擾如遇好事滋端及面生可疑之人許爾等協同鄉  
約立即扭稟本府以憑根究嚴辦其各凜遵毋違特  
示

招撫威遠猺夷文

會普洱  
總鎮銜

照得江外野猺擾及緬寧邊境現經制帥四路懸立  
重賞搜緝首惡俾就刑誅並仰體

皇上如天好生之仁不忍概加慘戮行令地方官遍張曉  
諭無論誤從逆黨及先後被脅之人如果復願爲

盛世良民傾心投出皆免其治罪且令地方官妥爲安插  
等因蓋大憲曲全爾等愚夷勤懇至此查近日侵擾  
鍋底塘翁烘鄉各匪自係前次逸猺冒昧從賊反正  
無由今見緬寧雲集官兵心存畏懼仍思還歸故土

伏處安身又以饑苦無聊沿途掠食及遇兵練堵截  
遂復苟逃性命潛竄狂奔此等猥夷自外生成罔知  
法紀固當剿除淨盡斷絕根株但大憲奉

命征討惟欲綏靖邊氓德恩寬大該夷等均係

朝廷赤子各有身家從前附和匪徒或不過一時迷誤  
若不愷切宣諭任爾等終懼重辟無路生全本鎮道  
有所不忍合亟出示通行爲此示仰猥夷人等知悉  
爾等如能立即猛省悔罪自新刻日約同投首不特  
免于治罪並許於閒曠地土各給爾等籽種自耕自

食完聚室家想爾等莫不意在謀生急求得所與其  
甘於從逆焚搶奔逃履險蹈危不保朝夕何如及早  
歸正承受

聖恩長爲仁壽之民共享

昇平之福恬熙安樂傳及子孫豈不甚善倘示後仍梗頑  
不悟尙敢成羣嘯聚抗拒官兵定卽盡行駢誅無遺  
種類後悔其何及也各宜凜遵毋違

告納樓楊泗廟鎮江王文

嘉慶戊午春夏之交納樓澧社江六蓬渡口苦螞蝗  
爲祟或時覆舟吸人膏脂以飽其腹本旬長官督工  
人建楊泗鎮江王廟以靖之是秋之杪知臨安府事  
某因其以訖工來諗念神依民而行宜潔齋以致禱  
也敬製爲文訊日遣長官普澤以豕羊醴殺昭告於  
勅封楊泗鎮江王之神座前曰

聖天子在上成民秩祀翼翼嚴嚴砥屬之方百靈効職惟  
王神威顯耀懋功德以庇民江宿海行靡有菑害歆

享俎豆不隔於遐荒茲蠹爾戾蟲之屬焉攸憑恃橫  
宅江潭肆行吞噬爲禍無辜之商旅至於此伏誅不  
速民何以堪今某職在守土命攝行者以菜油成石  
蜂蜜成挑投之江中助王拏攫王其赫然震怒奮紫  
臺之餘威迅施斧斯斷其軀殼俾舟行賈客永永年  
代無有後艱則是禮經所稱爲民禦災捍患者惟王  
終始一節勤勉行之歲時報饗虔肅馨香戴德羣氓  
其必無負敢敬以告神庶鑒臨